

Kumpulan Teater Senandika Raih Naib Juara



Pekan, 25 Mei- Kumpulan Teater Senandika dari Sekretariat Kebudayaan & Kesenian UMP naib juara Pertandingan Pengisahan Kenegaraan 1 Malaysia Peringkat Negeri Pahang mewakili daerah Pekan dengan membawa pulang wang tunai RM2,000.00, sijil dan cenderamata dalam pertandingan akhir yang dijalankan di Sekolah Sains Sultan Haji Ahmad Shah.

Lima kumpulan telah melayakkan diri ke peringkat akhir iaitu kumpulan yang mewakili daerah Pekan, Kuantan, Raub, Maran dan Jerantut dalam pertandingan saringan melibatkan 10 kumpulan peringkat saringan yang diadakan di Sempurna Resort, Kuantan.

Program anjuran Jabatan Penerangan Negeri Pahang ini bertujuan menggalakkan masyarakat umum menyampaikan pandangan dan pendapat mengenai peristiwa-peristiwa bersejarah dan juga tokoh-tokoh yang telah diiktiraf kejayaan mereka di Malaysia sebagai satu usaha pendidikan berterusan yang boleh dimanfaatkan dalam proses pembinaan negara bangsa dan jati diri rakyat Malaysia.



Selain itu, pertandingan ini dapat memupuk dan menyuburkan semangat intergrasi nasional antara wilayah, suku kaum, budaya dan kepercayaan melalui rentetan sejarah dan perjuangan tokoh-tokoh negara. mentasan selama 15 minit ini menampilkan naskah bertajuk 'Aku Kartunis' karya Mohamad Radzi Mohd Sojak, mahasiswa tahun 2 Fakulti Kejuruteraan Pembuatan berkisahkan perjuangan Datuk Lat atau nama sebenarnya Mohammad Nor Khalid dalam menyatupadukan bangsa di Malaysia serta jasa dan bakti beliau kepada tanahair.

Menurut Mohamad Radzi, iIlham menulis skrip mengenai tokoh kartunis terhasil apabila kami cuba mencari seorang tokoh yang hampir dilupakan oleh generasi muda supaya dapat disampaikan dengan cara yang lebih mudah difahami oleh pelbagai lapisan masyarakat tanpa mengenal usia. Selain itu pihaknya cuba untuk keluar daripada konteks skrip yang biasa dipersembahkan seperti Tunku Mohamad Saad, Rantap, Tun Hussien Onn, Tun Abdul Razak dan sebagainya.

Manakala ketua Kumpulan Senandika, Ili Zhafirah Mardhiah Hashim berkata, program ini adalah salah satu cabaran yang disahut bersama bagi mempelajari satu ilmu baru untuk kami.

"Komitmen dan kerjasama yang tinggi amat perlu bagi memastikan hasil yang dipersembahkan membuahkan kejayaan. Tanpa ahli dan jawatankuasa yang saling membantu, Senandika tidak akan mengecapi kejayaan demi kejayaan sehingga ke hari," katanya.



Bagi pendukung watak utama sebagai Salim dan Dato' Lat, Aizat Abdul Muttalib, pelajar tahun 4, Fakulti Kejuruteraan Elektrik & Elektronik (FKEE), dibantu watak Ijam oleh Mahadzir Nadzri, pelajar tahun 4 Fakulti Kejuruteraan Mekanikal (FKM) dan watak Boy oleh Muhammd Shukry Md. Yunus@Iskandar, pelajar tahun 3, Fakulti Kejuruteraan Mekanikal (FKM).

Mereka beranggapan berkata "memandangkan tidak semua tokoh dapat dipelajari di sekolah, pertandingan ini secara tidak langsung membuka mata anak-anak muda tentang pengorbanan, jasa dan sumbangan seorang tokoh yang kurang dikenali. Kami sendiri turut mulai cakna terhadap tokoh-tokoh negarawan dalam pelbagai bidang setelah menyertai program ini."

Seorang mahasiswa yang hadir memberi sokongan kepada kumpulan UMP yang bertanding, Intan Nurfarhanah Mohd Said, tahun 2, Fakulti Kejuruteraan Elektrik & Elektronik (FKEE), menyifatkan program ini sangat perlu diteruskan supaya mahasiswa terutamanya dapat memahami dan melaksanakan hak dan kewajipan secara santun dan beradab sebagai golongan yang terdidik. Penganjuran ini sangat menarik kerana mudah difahami dan dihayati secara ringkas sekaligus meningkatkan semangat nasionalisme. Majlis dihadiri Pengarah Pusat Sukan dan Kebudayaan UMP, Abd. Rahman Hj. Safie dan Pembantu Penerangan, Jabatan Penerangan Daerah Pekan, Ismail Idris.

Berita disediakan oleh Noor Afiza Mohd. Asmi dari Pusat Sukan dan Kebudayaan dan suntingan Bahagian Komunikasi Korporat UMP.

Posted By : NOR FADZILLAH BINTI ZULKIPLI Date Posted : 31-05-2016, 15:56:29